

KERWEREDD 2001

Intro

Ihr lieve Leit unn Kerwegäsch,
heit feire mer unser scheenschtes Fescht.
E Johr iss rum, nu isses soweit,
mer feire werre unser scheenie Kerwezeit.

Am Freitag hammer se do owwe uff de Fels werre zum Lewe erweckt,
mer han gesung, geplärrt, Bier getrunken unn was uns sonscht noch alles schmeckt.

Das ganze geht bis Dienstag Owend so weiter,
bis mer se dann endlich begrawe, ... äh, ich menn leider!!!

Awwer was ich Eich heit so verzehl, alle wiener do sitze,
do mach Ich bestimmt kä Witze.

Das was glei kommt iss alles wohr,
es iss bassert im letschde Kerwejohr.

Doch bevor ich lang dorumkragehle,
du Ich Eich die Geschichtcher vun de Leit verzehle.

Doch iss manches erstunke unn erloe,
so fühlen sie sich zu recht betroe.
Ich entschuldige mich schummol in aller Form,
unner und übber de Norm.

Nerremohrer Straussbuwe...

Die Kühlerfigur

Do hat sich vor e paar Monat was zugetraa,
de Stephan, de Michael unn de Richie sin mem Roller übber de Klingelweg gefahr.

Do hot de Stephan e kleenes Problem,
doch zum ohalle, warer zu bequem.

Der fackelt net lang, unn tret ins Pedal,
Was vorne uff de Stroß war, dass war dem egal.

Währenddesse fahrt denne uff dem selben Wege,
de Jürgen in seinem Trecker entgesche.

De Stephan, noch ganz abgelenkt,
guckt net wo er annelenkt.

Dann guckt er ganz schnell uff, unn
fahrt frontal em Jürgen uff de Traktor druff.

Der Herr im Bulldog, ganz perplex,
iss erscht mol zu de annere beide gewetzt.

Ausse trifft denne fascht de Schlaach,
so e Kühlerfigur hat der net jede Daach.

Do hann se de Stephan genumm, so wie er war,
unn erscht mol ganz fix Hehm gefahr.

Drum ihr lieve Rollerfahrer, stellen Eich net so dro,
unn hallen, wann Ihr e Problemche hann, efach o.

Die Musik spielt dem Stephan: "Stephan, ich kratz dich von meim Traktor ab!"

Nerremohrer Straussbuwe...

Die alt Sau do!

Letschde Winter Ihr liewe Leit,
hat sich e Wildschwein garnet gefreit.

Die alt Sau, teils verletzt,
iss durch de Wald no Nerremohr gehetzt.

Das arme Vieh, schun halb erledischt,
hat dann de Naßhan seines Zaunes entledischt.

Ohne sich noch lang zu sträube,
wollt sichs dann am Milchheisje mit Alkohol betäube.

Trepp ruff unn Trepp runner,
wurd das Vieh erscht rischtich munner.

Doch es fand keh Ruh,
denn die Dehr war zu.

Dann eilt es schnell übber die Hauptstroß zum Zirke in de Hof,
unn iss dort mem Kopp gege es Garagetor gerennt, gott iss das Vieh doof.

Vom Schmerze ganz benomme,
hat's efach e neu Route genomme.

Übberm Reis sei Grundstück isses durch die Bach geschwomm,
Unn hinnen aus zum Boltzplatz komm.

Die Stemmlerscher im Schweinestall,
han sich vor Angscht schon Arm in Arm gehall.

Sie han schnell uffem Handy die Nummer vun de Polizei gewählt,

unn denne mol die ganz Sach verzählt.

Inzwische war die Sau verschwunn,
unn ward nimmermehr gefunn.

Unn die Moral Ihr liewe Jäschersleit,
es nächshte mol schiessen Ihr gescheit.

Die Musik spielt dere Sau: "Do wert die Wutz geschlacht!"

Nerremohrer Straussbuwe...

Der Einbruch

Mit Schlüssel iss das so e Sach, an die muss mer immer denke,
ansonschte kann das böse Ende.

Der grüne Reinhold, enes morsche,
ging vor die Dehr was zu besorsche.

Kaum isser drauss, schun fällt sei Los,
denn hinner ihm fällt die Dehr ins Schloss

Vor Verzweiflung unn Wut hat er sich's Hirn verrenkt,
weil an sei Schlüssel, hat er net gedenkt.

Doch der Kerl iss garnet dumm,
der laaft erscht mol rund ums Haus erum.

Doch es war kee Fenschter uff,
do haut mer halt mol efach druff.

Denn Scherbe bringe jo bekanntlich Glück,
unn so konnt er dann endlich ins Haus serick.

Drum due mer Ihm noch was uff de Weg mitgewwe,
es nächschte mol dusche dei Schlüssel mitnemme.

Die Musik spielt dem Einbrecher: "Marmor, Stein und Fensterbruch!"

Nerremohrer Straussbuwe...

Alzheimer auf Rädern

Letscht Johr im Sommer, do iss was bassiert,
do hot's Anja kräfdisch Geld kassiert.

Vorne im Hof hat sei giftgrüner Lupo gestann,
unn domols war seinem Auto noch garnix dran.

Enes scheenen moins lein in Ihrem Bett,
gemütlich de Patrick unn's Anja unner de Deck.

Es war so e warmer, klarer Daa,
wie jeder annere in dem Sommer a.

Man hätt nix beeses gedenkt, doch dann,
gebts e lauter Knall, denn irgendwas fährt am Anja sei Auto dran.

Gott, iss do e Unglück bassert,
dass hat mer in de Luitpoldstroß noch scheppere geheert.

Do springen beide ans Fenschter unn denke: "Ei was war dann das geweh?",
doch do, wo vorher es Auto war, hat nur noch e Radkapp geleh.

E alter Opa, an die 70 Jahre alt,
iss neue in de Lupo ninngesnallt.

Sei Aldi, die hat newedro gesess,
unn sich vor Angscht ball in die Hosse geschess.

Es Anja stürmt enaus mit Träne in de Aue,
kann awwer nur noch um sei Vehikel trauere.

Es hat sich schon gedenkt: "Iss der Alt beim Unfall net verreckt,

bring ich denne efach jetzt um die Eck!"

De Patrick hat dann beim ADAC-Pannenservice angeruf,
sie sollte mol e Abschleppwae schicke, unn halle er bitte druff.

Die ADAC-Diagnose: "Ihr Auto iss total im Arsch!",
do bloßt´s Anja dem Alt mol gehörisch de Marsch.

Denne han dann schnell sei Kinner gehol unn mit Hem genomm,
bevor´s Anja in seiner Wut noch uff dumme Idee wär komm.

Die Musik spielt dem arme Mäde: "Tränen lügen nicht!"

Nerremohrer Straussbuwe...

Geistergeher uff de A6

Uff de Autobahn iss jo als emol Stau,
awwer manche Leit sinn do ganz schlau.

Die schalde beim fahre es Radio in,
unn herrsche dann efach in die Wunnerkischt rin.

So ähnlich wars a dem Felsewirt geschehe,
der musst nämlich mit de Arwet mol no Darmstadt gehe.

Dort musst er e paar Übunge uffem Schiessplatz abhalle,
sollte Terrorischte mol sei Konvoi überfalle.

Uff de Hemfahrt hann'se dann vom 15 km lange Stau uff de Autobahn gehehrt,
do war die Grupp net so ganz gerehrt.

Dann saat de Toni zum Herr Fahrer,
die Streck übber Mainz wär efacher.

Doch es kommt, wie's komme musst,
unn do verging em Toni dann schlachartisch die Luscht.

Der Depp von Fahrer, so doof wie er war,
iss schee gradaus weiter in de Stau eninn gefahr.

Do hot de Toni gescholl unn ramesiert,
iss ausgeschtie unn hat noch am Standstreife rumrandaliert.

Dann hat er kurzerhand die Beh in die Händ genumm,
unn iss in der Ferne der Autobahn verschwunn.

Do laaft er dann ganz einsam die Autobahn hinaus,

denn er wollt endlich zu seiner Familie nach Haus.

Doch komme dut er net weit,
die Polizei schnappt ne schun no kurzer Zeit.

Die han denne mol in Gewahrsam genumm,
unn schnell no Lautre an sei Fiesta gebrung.

Währenddesse stehen noch im Stau,
die Reischbacher Buwe, die han de Toni gesieh, waren aber net so schlau.

Die Musik spielt dem Geistergeher: "Country Roads!"

Nerremohrer Straussbuwe...

Die plötzliche Erleuchtung

Es Siggie is jo e schlaui Fraa,
unn stellt sich normal net so doof dra.

Awwer wie de Betze gespielt hot,
do gings fer es es dehehm zu flott.

De Rudi hats in de Wohnung rumgehetzt,
unn es iss ganz orientierungslos in aller Hektik do rum gewetzt.

Sie musste sich fertisch mache fer uff de Betze,
deswege musst a de Rudi so hetze.

Dann ab ins Auto fer schnell loszufahre,
bisse uff de A6 kerz vor Lautre ware.

Uff emol iss em Siggie was beeses geschwahndt,
es guckt in die Tasch unn, es hat's jo geahndt.

Es hat in aller Hektik die Karte vergess,
es liebscht hätt sich's selber in de Arsch gebess.

De Rudi rauft sich am Steuer die Hoor,
doch es hat alles kee Sinn, sie müsse serick no Nerremohr.

Jetzt hotten die beide sich so uff de Betze gefreet,
unn han schun gedenkt, sie käme zu spät.

Awwer sie sinn doch noch rechtzeitig akomm,
unn 10 Minute später hat dann es Spiel begunn.

Ja, unn was lerne mer dodraus,

es nächschte mol, bleibe ner ganz zu Haus.

Diesmol werts de Musik net erschwert,
weil so e Sauerei, wert net verehrt.

Gertruds Horrortrip

Im Sommer iss jo bekanntlich Urlaubszeit,
mancher bleibt deheim, mancher fahrt weit weg, annere net so weit.

Die Familien Schnabel, Weber unn Roth fahre in solche Dae,
meishtens no Frankreich fer Bootsche zu fahre.

Doch mit de Zeit verging em Erich dann die Luscht,
als Passagier plache ne Tatendrang unn Fruscht.

Er wollt das Schiff mol selber lenke,
also wäre an e Bootsführerschein zu denke.

Em Gertrud iss die Sach net so geheuer,
dass losst de Erich net gern ans Steuer.

Doch de Erich iss von dere Idee vollendts begeisttert,
unn´s Gertrud war später doch erleischtert.

De Rudi geht a mit de Führerschein zu mache,
doch dann hot de Erich nix meh zu lache.

Zuerscht kommt emol die Theorie,
so konfus war de Erich noch nie.

"Was laberd dann der Depp von Lehrer do?
Wann gehts dann endlich an die Praxis dro?"

Denkt sich do de Erich,
denn der war das gebabbel lerich.

De Rudi muss newedro gut uffbasse,

weil, er will jo später nix vermassele.

Doch dann gehts ab in de nasse Kanal,
unn de Erich merkt, dass Schiff iss net aus em härtschte Stahl.

De Rudi, der fahrt ganz elegant,
awwer de Erich knallt andauernd gege die Wand.

Fer's Gertrud wert die Tour zum Horrortrip,
es denkt, wär es doch bloß deheim geblibb.

Unn würd das net schon reiche,
müssen em Erich uffem Kanal alle Boote ausweiche.

Do setzt de Lehrer dere Sach mol e Ende,
denn der will kee Sprit meh an de Erich verschwende.

Es Gertrud iss vor Angscht in Ohnmacht gefall,
dem hann se dann schnell es Riechsalz unner de Kolbe gehall.

Schon stehts widder uffrecht unn schnappt sich sei Mann,
ens steht fesch, an e Steuer losst das denne nimmie dran.

Es Fazit: De Rudi hat bestann,
De Erich darf nächschtjohr nochmol dran.

Die Musik spielt dem Kanalpirat: "Fahr doch ein knallrotes Gummiboot!"

Nerremohrer Straussbuwe....

Wo iss mei Mann?

Wie´s an de Fassenacht so iss, ihr Leit,
die Stimmung iss riesisch, die Spannung, die schteit.

Do fahren moins schun in aller frieh,
e paar von Nerremohr no Homburg hie.

Es werd geschunkelt unn gelach,
unn bis Nachts durchgemach.

De Megges iss Nachts dann a benomme,
unn werd bis Bruchmühlbach mitgenomme.

Als er sich dort uff e Mauer setzt,
denkt er sich: "Unn was mach ich jetzt?"

Dann kam die Erleuchtung, ihm wurd ganz wohl
hat schnell es Handy eraus gehol,
unn ruft beim Helga ganz schnell oh,
zum Glück war nachts de Frank dann dro.

Es wurde a kä Worte gemach,
es Heike unn´s Helga sinn dro an die Sach.

Sie sinn ins Auto unn losgesprindet,
unn 5 Minute später de Frank e SMS uffem Handy findet.

"Komm schnell no Katzebach, abber fit, fit,
unn bring e Kanischer Sprit noch mit!"

De Frank düst dert hie unn füllt de Tank,
es Heike sieht aus, als wärs schon krank.

Denn sei Bläsje war voll, doch ganz raffiniert,
hatt's dort ans Haus gepinkelt, ganz unscheniert.

Dann schnell an die Tankstell, unn de Megges gehol,
dem wars garnet gut, ich glaab der war voll.

Dann hann se ne gesucht, sie sinn übberall hie,
abber kenner hat de Megges gesieh.

Doch plötzlich kreischts Helga: "Kommen schnell her..."
de Megges zu finne, war garnet so schwer.

Er leit in de Badwann, es Helga find's toll,
unn ruft: "... Heike, Eier Badwann iss voll!"

Die Musik spielt dem Megges, iss ja klar: "Wasser iss zum waschen da!"

Nerremohrer Straussbuwe...

Coole Schääf

E junger Mann außem Ort, dass muss ich noch sae,
fährt e BMW-Capriolet, e scharfer Wae.

Doch das Auto iss zu deier, er will lieber laafe,
unn will denne Karre ganz schnell verkaafe.

Er versuchts übbes Internet: WWW.AutoEmrich.DE,
doch muss er es noch butze, damit es glänzt a schee.

Er raamt rischtisch uff unn freet sich wie e Kind,
unn leet alles uffem Kurt sei Kofferraum, damit er es a widder find.

Do kommt ganz schee was zusamme, eiseren iss sei Wille,
uffem Kofferraum iss ball kä Platz meh, do leie Dose, Tempos unn Sonnebrille.

Dann hat er's geschafft, ess Auto iss geputzt,
de Frank hat schnell die Zeit genutzt.

Er iss Dusche unn hat sich umgezoh,
unn iss dann schnell de Freundinn no.

Inzwische fällt em Kurt dann in,
"Ei ich muss jo zu de Schääf, schnell ab in de Vektra nin!"

Er startet es Auto unn strahlt wie e Könisch,
was hinne uffem Kofferraum leit, steert ne wenisch.

Am nächschte Daa kam es große erwache,
"Ach Gott...", denkt de Frank, "Wo sinn dann mei Sache!"

Es Helga rennt die Stroß ab, eruff unn erunner,

doch es hat nix gefunn, dass war a kä Wunner.

Awwer wenn Ehr Owends gehn de Wänerstall enuff,
dann bassen dert mol ganz genau uff.

Dann kenne Ehr dort nämlich sehe,
die Schääf mit de Sonnebrille uff de Wies erumm stehe.

Die Musik spielt dere Familie ohne Scham: "Kaafen neie Sonnebrille beim Trödler Abraham!"

Geplättet

Unn zum Schluss wolle mer noch bewaise,
beim Autofahre baue net nur Fraue scheisse.

Do gebt´s e Kerl, e gestannener Mann,
der hot es letscht e saudoofie Pann.

Man leht jo alsmol Kleenischkeete uff dei Auto druff,
unn später passt man dann nimmie druff uff.

Dann fahrt mer los unn´s Zeich geht verlore,
abber führen Eich jetzt mol dass zu Ohre.

Unser Gemeendediener iss jo jetzt ganz Trendy,
unn kaaft sich, um Mobil zu sinn, e schickes Handy.

So e Handy iss e feinie Sach,
grad so kompakt fer in die Tasch ins Fach.

De Ulli musst emol sei Händ entleere,
weil so e kleenes Ding iss alsmol läschtisch unn kann als schteere.

Fer sei Händ rischtisch frei zur Arbeit zu bewehe,
muss er das Ding erscht mol mol uff es Schutzblech vom Tracktorreefe lehe.

No kurzer Zeit iss die Sach mit de Arwet gegess,
doch sei Handy, dass hat er schon vergess.

Das rutscht dann beim zünde vom Motor hinne es Schutzblech erunner,
unn leit dann unnerm große Reefe drunner.

De Ulli haut de Rückwertsgang rin, guckt nochmol eriwwer unn eniwwer,

gebt gas unn bretttert übber sei Handy driwwer.

Das Ding war platt, unn nimmie zu gebrauchte,
gerademol in de Peif häsch'e das noch kenne rauche.

Do hot nixmeh geholf, a kä Haare raufe,
do helfft nur noch ens, e neies kaufe.

Die Musik spielt dem Technikbanause: "Kein Schwein ruft mich an!"

Nerremohrer Straussbuwe...

Final

Bevor ich zum Schluss komm, will ich mich ohne Schranke
fer die Unnerschützung vom Arbeiterverein, de Musik unn bei alle annere, die uns geholf
han, bedanke!!!

Unn außerdem beim Sonja, das uns in aller Zeitennot unn Hast,
noch schnell 2 Geschichte fer die Kerweredd hat verfasst!!!

Ehr Leit, drum dun jetzt all die Händ aus de Säck eraus,
unn gewwe denne Leit Ihr verdienter Applaus!!!

Unn so mancher der do owwe sei Name konnt here,
der wert sich dodrübber doch hoffentlich net schteere!!!

Ehr hann jetzt bestimmt Derscht unn wolle e paar Schoppe schligge,
drum du ich mich jetzt a nimmie lang uff dere Latt rumdrigge!!!

Fer die Getränke hann es Susi unn de Toni a reischlich gesorscht,
unn fer de Hunger gebt´s a em Irena sei gutie gebrotenie Worscht!!!

Ich menn allemol, es reicht fer das Johr,
ich hann jo heit a noch was besseres vor!!!

Anschliessend dun mer noch die 3 Erschde tippele,
hoffentlich dun sich dodebei net unser Füß verknibbele!!!

Awwer bevor mer dodezu komme das alles zu genieße,
will ich noch unser scheener Strauss begiesse!!!

"DU SOLLSCHT ES GANZE JOHR ÜBBER HENKE,
DASS MER NOCH LANG AN UNSER SCHEENIE KERB SERICK DENKE!!!!!!"

Nerremohrer Straussbuwe...

Ich saa Eich noch Tschüss unn Aufwiederseh'n,
unn feiere mer unser Kerb recht schön!!!

Unn noch kerz zum Schluss, ...

hänge mer de Führer an de Straussspitz uff!!!

(Kurze, persönliche Schlussbemerkung, welche in der Original Kerweredd verfasst,
aber aus Angst vor gewissen Racheakten gewisser Nanzd... nicht vorgetragen wurde, welche
ein Exempel der Niedermohrer Liberalität staduiieren sollte!!!)

Grabredd

Jetzt steh ich do, unn beklach mich,
gott, ihr Leit, dass iss so tragisch.

Sie iss rum, mer kennen´s net verstehe,
mer kennte grad nochmol durchs Dorf sammele gehe.

Mit unsere Stimmcher, sinn mer zwar schon am Ende,
unn genauso sieht´s aus in unserem Börsegelende.

Awwer es kennt grad noch so weitergehe,
doch es helft kä bettele, unn kä flehe.

Übber die Kerb hann manche viel scheisse gebaut,
annere hann sich a mol was getraut.

Jetzt heests 1 Johr warte bis wiedder ennie iss,
glaaben Ihr mir, dass ich die jetzt schon vermiss?

Die annere Straussbuwe vermissen se bestimmt a,
genauso wie ich, dass is jo klar.

Ens muss ich unsere Straussbuwe mol stecke,
so wie sich manche Verhall hann, hätt's Katharina kenne verrecke.

Unser Straussvatter hat nur teilweise mitgekrisch,
unn so iss uns die Zeit ohne sei Anwesenheit verstrich.

Manch enner von uns iss erscht garnet gekomm,
enner zum Beispiel hot e Stich von de Sonn.

Do iss der dann efach deheem geblebb,
anstats das er do owwe Stimmung macht, der Depp.

Am Samstag Owend hann die Leit gelach,
de Stennwillerer Eckhard hat Krach gemach.

Unne an de Ufffahrt hat er em es Schoppeglas durch die Fenschterscheib geschmiss,
do hot er dann ausgeschiss.

Der Kerl hat geschlaa kriet uff sei Mapp,
die Leit hann gedenkt, was geht dann do unne ab?

Do sinn die Leit enunner gerennt fer zu lache un sich zu ergetze,
die hotten sich gedenkt: "Das iss jo besser wie uffem Betze!"

Seitdem hat mer kä Stennwillerer meh gesieh,
die hann se gekriet, unn wie.

E Straussbu hammer gehat,
bei dem ware mer wirklich platt.

Der hat gekrisch unn gesung,
unn mit alle do owwe e Schoppe geschwung.

Der iss als geblibb bis zum bittere Ende,
unn iss dann Hehm gestolpert, ganz behende.

Abber am Montag moin, do iss'er net Hehm,
dodran zu denke, war dem schon zu scheen.

Der iss um 3 Uhr Hehm gang fer sich de Kittel umzuwerfe,
fer um 3 beim Kalli die Messer zu scherfe.

Dort hot er dann bis Mittags geschafft,
do waren abber sei Glieder a schon erschlafft.

Do isser dann Hehm in sei scheenes Bett,
unn ab unner die dick warm Deck.

Unser Straussvatter, was hot Er dann dies Johr von seinem rumgeblödel,
jetzt iss Er schwer verletzt, der alde Dödel.

Was der Kerl als hot an Promille,
do helfe der moins a kä Kopwehpille.

Am Sontag isser em Bauer Sascha vom Treckerwae runnergefall,
dem Sei Kopp uff em Asphalt, dass gab e lauter Knall.

Drunne bei Witte hat unser Stephan die Hausdehr zugeschlaa,
de Frank hot sei Finger drin, die Dehr iss direkt an denne dra.

Am Montag moin warer a schon im Kreissparkassebrunne bade,
do drin hatt's geschtunk no tode Ratte.

Unn genau so hatt's a geschmeckt,
Er hat jo a alsmol dran geleckt.

Sei Finger unn Sei reschtliche Wunde,
die hat Er die Kerb übber ganz schee geschunde.

Am Montag um 10 Uhr zu seiner Thekeschicht,
hat Er ausgesieh als hätt Er schon die Gischt.

Gott, war der arme Schlucker so kaputt,
der hat aus de Aue geguckt wie e Kiffer no seiner Tutt.

Dies Johr hatt's a viel Unfäll gebb,
man sauft unn sauft unn leit später dann im Dreck.

Beim tanze floge mer als von de Bänk enunner,
doch trotz de Schmerze ware mer dann noch munner.

Einische Gläser sinn zu Bruch gegang,
manch enner verspürte e Kotz- unn Erbrechensdrang.

Awwer net nur bei uns Junge iss das so,
de Helmut iss a von de Bank uff die Lipp gefloh.

Das alles war der gute Suff,
doch hier und heute hert's dann uff.

Das alles iss so traurisch, ihr liewe Leit,
drum wunnern Eich net, wann manch enner weint.

Sogar die Nannzwillerer warn dies Johr superklasse,
halt wie mer's von ne erwarte sollt, e rischtische Arierrasse.

Enner hat zwar e Glas in de Hand zerdrückt,
Do hann dann die Leit gedenkt: "Iss dann der verrückt?"

Er hat uns dann Borm unn Bänk mem Blut versaut,
abber sie hann dies Johr nix geklaut.

Sie hann a garnet randaliert,
ich glaab, sie hann sich e bissje scheniert.

Drum saa ich Eich, bei unserm scheene Strauss,
gebben denne Nannzwillerer e kräftischer Applaus.

Hoffer mer, das se in Zukunft immer so freundlich sinn,
weil, mol ehrlich, dass wär e echtes Ding.

Alla dann, ihr liewe Leit,
es iss traurisch, doch nun isses soweit.

Es Loch iss gegrab,
Die Kerb iss im Sarg.

Ich hoffe bis nächscht Johr bleibe ner uns gewoge,
denn dann kommt se widder, ungeloge.

Bleibt nur noch ens zu due an dem do Daa,
jetzt werd de Sarg zu grabe getraa.

Du liebie Kerb, nun ruhe sanft,
und schlafe ein in Gottes Hand.

Machens gut ihr liewe Leit, trinke noch e guter Liter,
nächst Johr, siehe mer uns wiedder.

Ende - mit besten Dank an den AUV und
an alle andere, denen irgendwelche Scheiße passiert ist!!!!